

COVID-19: 106 kes baharu, jumlah kumulatif kini 1,624 kes

Astro Awani

24 Mac 2020

Nursyazwani Saiful Sham,

KUALA LUMPUR : Malaysia mencatatkan 106 kes positif COVID-19 setakat Selasa, jam 12 tengahari menjadikan jumlah kumulatif adalah 1,624 kes.

Menurut Ketua Pengarah Kesihatan, Datuk Dr Noor Hisham Abdullah, berdasarkan siasatan awal, daripada 106 kes baharu yang dilaporkan hari ini, 43 kes adalah berkaitan kluster perhimpunan tabligh di Seri Petaling.

"63 kes lagi adalah berkaitan dengan lain-lain kluster dan masih lagi dalam siasatan untuk kepastian.

"Sehingga kini, seramai 64 kes positif COVID-19 sedang dirawat di Unit Rawatan Rapi (ICU). Daripada jumlah tersebut, 27 kes memerlukan bantuan pernafasan," jelasnya.

Dr Noor Hisham turut menjelaskan satu kematian yang dilaporkan hari ini melibatkan seorang lelaki warganegara Malaysia berusia 70 tahun menjadikan jumlah kumulatif kematian adalah sebanyak 15 kes.

"Kes kematian ke-15 merupakan kes ke-1519, beliau mempunyai penyakit kencing manis dan darah tinggi, dan disyaki mempunyai sejarah kontak dengan kes positif COVID-19 (iaitu kes ke-703 semasa solat Jumaat).

"KKM ingin mengucapkan takziah kepada ahli keluarga beliau." ujarnya.

Pada masa sama Dr Noor Hisham turut memaklumkan, ujian makmal yang dijalankan di makmal fasiliti kesihatan kerajaan bagi mengesan jangkitan COVID-19 adalah dengan menggunakan teknik Real-Time Reverse Transcription Polymerase Chain Reaction (rRT-PCR).

"Ujian rRT-PCR yang dijalankan akan mengesan kehadiran virus COVID-19 yang terdapat di dalam badan pesakit. Justeru, ujian rRT-PCR COVID19 yang positif bermaksud individu tersebut telah dijangkiti oleh virus COVID-19.

"Manakala ujian melalui teknik rapid test kit (RTK) yang kini terdapat di pasaran adalah bagi mengesan antibodi yang terhasil di dalam badan akibat jangkitan yang dialami.

Antibodi muncul di dalam badan sekitar 5-8 hari selepas jangkitan. Ujian RTK yang mengesan antibodi tidak dapat mengesan virus dan membuat pengesanan pantas jangkitan.

"Oleh yang demikian, KKM menggesa orang ramai untuk tidak menjalani ujian RTK dengan sewenang-wenangnya tanpa mendapat khidmat nasihat dari Pengamal Perubatan, kerana ia berpotensi untuk menimbulkan salah tafsir dan keresahan terhadap keputusan ujian yang diperolehi," katanya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/covid-19-106-kes-baharu-jumlah-kumulatif-kini-1-624-kes-235056>